

四庫全書

集部

欽定四庫全書

集部

玉臺新詠卷一  
五

詳校官中書臣陸 湘

助教臣常循覆勘

總校官降調編修臣 倉聖脉

校對官編修臣 勵守謙

謄錄監生臣 李經盛

欽定四庫全書

集部八

玉臺新詠

總集類

提要

臣等謹案玉臺新詠十卷陳徐陵撰案劉肅  
大唐新語曰梁簡文為太子好作艷詩境內  
化之晚年欲改作追之不及乃令徐陵撰玉  
臺集以大其體據此則是書作於梁時故簡  
文稱皇太子元帝稱湘東王今本題陳尚書

左僕射太子少傅東海徐陵撰殆後人之所  
追改如劉勰文心雕龍本作於齊而題梁通  
事舍人也其書前八卷為自漢至梁五言詩  
第九卷為歌行第十卷為五言二韻之詩雖  
皆取綺羅脂粉之詞而去古未遠猶有講於  
溫柔敦厚之遺未可概以淫艷斥之其中如  
曹植棄婦篇庾信七夕詩今本集皆失載據  
此可補闕佚又如馮惟訥詩紀載蘇伯玉妻

盤中詩作漢人據此知為晉代梅鼎祚詩乘  
載蘇武妻答外詩據此知為魏文帝作古詩  
西北有高樓等九首文選無名氏據此知為  
枚乘作飲馬長城窟行文選亦無名氏據此  
知為蔡邕作其有資攷證者亦不一明代刻  
本妄有增益故馮舒疑庾信有八北之作江  
總濫擘牋之什茅元楨本顛倒改竄更甚此  
本為趙宦光家所傳宋刻未有嘉定乙亥永

嘉陳王父重刻跋最為完善間有後人附入之作如武陵王閨妾寄征人詩沈約八詠之六諸篇皆一一註明尤為精審然王父跋稱初從外家李氏得舊京本間多錯謬後得石氏所藏錄本以補亡校脫其中如五言詩中入李延年歌一首陳琳飲馬長城窟行一首皆自亂其例七言詩中移東飛伯勞歌於越人歌之前亦乖世次疑石氏本有所竄亂而

玉父因之未察也觀劉克莊後村詩話所引  
玉臺新詠一一與此本脗合而嚴羽滄浪詩  
話謂古詩行行重行行篇玉臺新詠以越鳥  
巢南枝以下另為一首今此本仍聯為一首  
又謂盤中詩為蘇伯玉妻作見玉臺集今此  
本乃溷列傅元詩中蓋克莊所見即此本羽  
所見者又一別本是宋刻已有異同非陵之  
舊矣特不如明人變亂之甚為尚有典型耳

乾隆四十六年十二月恭校上

臣

乾隆四十六年十二月恭校上

總纂官臣紀昀臣陸錫熊臣孫士毅

總校官臣陸費墀



玉臺新詠序

夫凌雲臺日由余之所未窺萬戶千門張衡之所曾賦  
周王璧臺之上漢帝金屋之中玉樹以珊瑚作枝珠簾  
以瑇瑁為押其中有麗人焉其人五陵豪族充選掖庭  
四姓良家馳名永巷亦有潁川新市河間觀津本號嬌  
娥曾名巧笑楚王宮裏無不推其細腰衛國佳人俱言  
訝其纖手說詩歌禮豈東隣之自媒婉約風流異西施  
之被教弟兄協律生小學歌少長河陽由來能舞琵琶

新曲無待石崇笙簾雜引非關曹植傳鼓瑟於楊家得  
吹簫於秦女至若寵聞長樂陳后知而不平畫出天僊  
閼氏覽而遙如至如東隣巧笑來侍寢於更衣西子微  
顰得橫陳於甲帳陪遊馭娑騁纖腰於結風長樂鴛鴦  
奏新聲於度曲妝鳴蟬之薄鬢照墮馬之垂鬟反挿金  
鈿橫抽寶樹南都石黛最發雙蛾北地燕支偏開兩靨  
亦有嶺上僊童分丸魏帝膏中寶鳳授厯軒轅金星將  
嫠女爭華麝月與嫦娥競爽驚鸞冶袖時飄韓掾之香

飛鶯長裾宜結陳王之珮雖非圖畫入甘泉而不分言  
異神僊戲陽臺而無別真可謂傾國傾城無對無雙者  
也加以天情開朗逸思雕華妙解文章尤工詩賦瑠璃  
硯匣終日隨身翡翠筆牀無時離手清文滿筐非惟芍  
藥之花新製連篇寧止蒲萄之樹九日登高時有緣情  
之作萬年公主非無累德之辭其佳麗也如彼其才情  
也如此既而椒宮宛轉柘觀陰岑絳鶴晨簾銅蟲晝靜  
三星未夕不事懷衾五日猶賒誰能理曲優遊少託寂

莫多間厭長樂之踈鐘勞中宮之緩箭纖胥無力怯南陽之搏水生長深宮笑扶風之織錦雖復投壺玉女為歡盡於百嬌爭博齊姬心賞窮於六箸無怡神於暇景惟屬意於新詩庶得代彼皋蘇蠲茲愁疾但往世名篇當今巧製分諸麟閣散在鴻都不藉篇章無由披覽於是然脂暝寫弄筆晨書選錄豔歌凡為十卷曾無參於雅頌亦靡濫於風人涇渭之間若斯而已於是麗以金箱裝之寶軸三臺妙迹龍伸蠃屈之書五色華箋河北

膠東之紙高樓紅粉仍定魚魯之文辟惡生香聊防羽  
陵之蠹靈飛六甲高擅玉函鴻烈僊方長推丹枕至如  
青牛帳裏餘曲既終朱鳥窻前新妝已竟方當開茲縹  
帙散此緇繩永對翫於書幃長循環於纖手豈如鄧學  
春秋儒者之功難習竇專黃老金丹之術不成固勝西  
蜀豪家託情窮於魯殿東儲甲觀流詠止於洞簫變彼  
諸姬聊同棄日猗歟彤管無或譏焉陳尚書左僕射太  
子少傅東海徐陵撰



欽定四庫全書

玉臺新詠卷一

陳  
徐陵  
撰

古詩八首

古樂府詩六首

枚乘雜詩九首

李延年歌詩一首

并序

蘇武詩一首

辛延年羽林郎詩一首

班婕妤怨詩一首

并序

宋子侯董嬌嬈詩一首

漢時童謡歌一首

張衡同聲歌一首

秦嘉贈婦詩三首

并序

秦嘉妻徐淑荅詩一首

蔡邕飲馬長城窟行一首



陳琳飲馬長城窟行一首

徐幹詩二首

繁欽定情詩一首

古詩無人名為焦仲卿妻作

并序

古詩八首

上山采蘼蕪下山逢故夫長跪問故夫新人復何如新人雖言好未若故人妹顏色類相似手爪不相如新人從門入故人從閤去新人工織縑故人工織素織縑日

金少已八人  
一疋織素五丈餘將繅來比素新人不如故

凜凜歲云暮螻蛄多鳴悲涼風率已厲遊子寒無衣錦  
衾遺洛浦同袍與我違獨宿累長夜夢想見容輝良人  
惟古歡枉駕惠前綏願得常巧笑攜手同車歸既來不  
須臾又不處重闌諒無鷗風翼焉得凌風飛眄睠以適  
意引領遙相睇徙倚懷感傷垂涕霑雙扉

冉冉孤生竹結根泰山阿與君為新婚菟絲附女蘿菟  
絲生有時夫婦會有宜千里遠結婚悠悠隔山陂思君

令人老軒車來何遲傷彼蕙蘭花含英揚光輝過時而不采將隨秋草萎君亮執高節賤妾亦何為

孟冬寒氣至北風何慘慄愁多知夜長仰觀衆星列三五明月滿四五蟾兔缺客從遠方來遺我一書札上言長相思下言久離別置書懷袖中三歲字不減一心抱區區懼君不識察

客從遠方來遺我一端綺相去萬餘里故人心尚爾文彩雙鴛鴦裁為合歡被著以長相思緣以結不解以膠

金匱要略卷之七  
投漆中誰能別離此

四坐且莫誼願聽歌一言請說銅鑪器崔嵬象南山上  
枝似松柏下根據銅盤彫文各異類離婁自相聯誰能  
為此器公輸與魯班朱火然其中青煙颺其間從風入  
君懷四坐莫不歎香風難久居空令蕙草殘

悲與親友別氣結不能言贈子以自愛道遠會見難人  
生無幾時顛沛在其間念子棄我去新心有所歡結志  
青雲上何時復來還

穆穆清風至吹我羅裳裾青袍似春草長條隨風舒朝  
登津梁山褰裳望所思安得抱柱信皎日以為期

古樂府詩六首

日出東南隅照我秦氏樓秦氏有好女自言名羅敷羅  
敷善蠶桑采桑城南隅青絲為籠繩桂枝為籠鉤頭上  
倭墮髻耳中明月珠綠綺為下裾紫綺為上襦觀者見  
羅敷下擔捋髭鬚少年見羅敷脫巾著幘頭耕者忘其  
耕鋤者忘其鋤來歸相怨怒但坐觀羅敷使君從南來

五馬立峙嶠使君遣吏往問此誰家妹秦氏有好女自  
名為羅敷羅敷年幾何二十尚未滿十五頗有餘使君  
謝羅敷寧可共載不羅敷前置辭使君一何愚使君自  
有婦羅敷自有夫東方千餘騎夫婿居上頭何以識夫  
婿白馬從驪駒青絲繫馬尾黃金駱馬頭腰間鹿盧劍  
可直千萬餘十五府小吏二十朝大夫三十侍中郎四  
十專城居為人潔白皙髭髯頗有鬚盈盈公府步冉冉  
府中趨坐中數千人皆言夫婿珠日出東南隅行

相逢狹路間道隘不容車如何兩少年挾轂問君家君  
家誠易知易知復難忘黃金為君門白玉為君堂堂上  
置樽酒使作邯鄲倡中庭生桂樹華鐙何煌煌兄弟兩  
三人中子為侍郎五日一來歸道上自生光黃金駱馬  
頭觀者滿路傍入門時左顧但見雙鴛鴦鴛鴦七十二  
羅列自成行音聲何囀囀鶴鳴東西廂大婦織羅綺中  
婦織流黃小婦無所作挾瑟上高堂丈人且安坐調絲  
未遽央相逢狹路間

天上何所有，歷歷種白榆。桂樹夾道生，青龍對道隅。鳳皇鳴啾啾，一母將九鵠。顧視世間人，為樂甚獨殊。好婦出迎客，顏色正敷愉。伸腰再拜跪，問客平安不。請客北堂上，坐客氍毹清。白各異樽酒，上正華疏酌。酒持與客客言，主人持却略。再拜跪，然後持一柸，談笑未及竟。左顧勅中厨，促令辦粗飯。慎莫使稽留，廢禮送客出。盈府中趨送客，亦不遠足。不過門樞，取婦得如此。齊姜亦不如，健婦持門戶。勝一大丈夫，隴西行。



翩翩堂前燕冬藏夏來見兄弟兩三人流蕩在他縣故  
衣誰當補新衣誰當綻賴得賢主人覽取為吾綻夫壻  
從門來斜柯西北眄語卿且勿眄水清石自見石見何  
纍纍遠行不如歸 艷歌行

暄如山上雪皎若雲間月聞君有兩意故來相決絕今  
日斗酒會明旦溝水頭躑躑御溝上溝水東西流淒淒  
復淒淒嫁娶不須唬願得一心人白頭不相離竹竿何  
嫋嫋魚尾何萋萋男兒重意氣何用錢刀為 山上

雪

飛來雙白鵠乃從西北來  
十將五五羅列行不齊  
忽然卒疲病不能飛  
相隨五里一反顧六里一徘徊  
吾欲銜汝去口噤不能開  
吾欲負汝去羽毛日摧頽  
樂哉新相知憂來生別離  
峙嶠顧羣侶淚落縱橫催  
今日樂相樂延年萬歲期  
雙白鵠

枚乘雜詩九首

西北有高樓上與浮雲齊  
交疏結綺窓阿閣三重階  
上

有弦歌聲音響一何悲誰能為此曲無乃杞梁妻清商  
隨風發中曲正徘徊一彈再三歎慷慨有餘哀不惜歌  
者苦但傷知音稀願為雙鴻鵠奮翅起高飛

東城高且長逶迤自相屬回風動地起秋草萎已綠四  
時更變化歲暮一何速鵲風懷苦心蟋蟀傷局促蕩滌  
放情志何為自結束燕趙多佳人美者顏如玉被服羅  
裳衣當戶理清曲音響一何悲弦急知柱促馳情整中  
帶沈吟聊躑躅思為雙飛燕銜泥巢君屋

行行重行行與君生別離相去萬餘里各在天一涯道  
路阻且長會面安可知胡馬嘶北風越鳥巢南枝相去  
日已遠衣帶日已緩浮雲蔽白日遊子不顧反思君令  
人老歲月忽已晚棄捐勿復道努力加飧飯

涉江采芙蓉蘭澤多芳草采之欲遺誰所思在遠道還  
顧望舊鄉長路漫浩浩同心而離居傷憂以終老

青青河畔草鬱鬱園中柳盈盈樓上女皎皎當窓牖娥  
娥紅粉妝纖纖出素手昔為倡家女今為蕩子婦蕩子

行不歸空牀難獨守

蘭若生春陽涉冬猶盛滋願言追昔愛情款感四時美  
人在雲端天路隔無期夜光照玄陰長歎戀所思誰謂  
我無憂積念發狂癡

庭前有奇樹綠葉發華滋攀條折其榮將以遺所思馨  
香盈懷袖路遠莫致之此物何足貴但感別經時

迢迢牽牛星皎皎河漢女纖纖擢素手札札弄機杼終  
日不成章泣涕零如雨河漢清且淺相去復幾許盈盈

一水間脉脉不得語

明月何皎皎照我羅牀帷憂愁不能寐覽衣起徘徊客  
行雖云樂不如早旋歸出戶獨彷徨愁思當告誰引領  
還入房淚下霑裳衣

李延年歌詩一首

并序

李延年知音善歌舞每為漢武帝作新歌變曲聞者莫  
不感動延年侍上坐起舞歌曰

北方有佳人絕世而獨立一顧傾人城再顧傾人國傾

城復傾國佳人難再得

蘇武詩一首

結髮為夫婦恩愛兩不疑  
懼娛在今夕嫵婉及良時  
征夫懷遠路起視夜何其  
參辰皆已沒去去從此辭  
征役在戰場相見未有期  
握手一長歎淚為生別滋  
努力愛春華莫忘歡樂時  
生當復來歸死當長相思

辛延年羽林郎詩一首

昔有霍家妹姓馮名子都  
依倚將軍勢調笑酒家胡

姬年十五春日獨當鑪長裾連理帶廣袖合歡襦頭上  
藍田玉耳後大秦珠兩鬟何窈窕一世良所無一鬟五  
百萬兩鬟千萬餘不意金吾子娉婷過我廬銀鞍何昱  
燭翠蓋何峙壻就我求清酒絲繩提玉壺就我求珍肴  
金盤膾鯉魚貽我青銅鏡結我紅羅裾不惜紅羅裂何  
論輕賤軀男兒愛後婦女子重前夫人生有新故貴賤  
不相渝多謝金吾子私愛徒區區

班婕妤怨詩一首

并序



昔漢成帝班婕妤失寵供養於長信宮乃作賦自傷并  
為怨詩一首

新裂齊紈素鮮潔如霜雪裁為合歡扇團團似明月出  
入君懷袖動搖微風發常恐秋節至涼風奪炎熱棄捐  
篋笥中恩情中道絕

宋子侯董嬌嬈詩一首

洛陽城東路桃李生路傍花花自相對葉葉自相當春  
風東北起花葉正低昂不知誰家子提籠行采桑纖手

折其枝花落何飄颻請謝彼妹子何為見損傷高秋八  
九月白露變為霜終年會飄墮安得久馨香秋時自零  
落春月復芬芳何時盛年去懽愛永相忘吾欲竟此曲  
此曲愁人腸歸來酌美酒挾瑟上高堂

漢時童謡歌一首

城中好高髻四方高一尺城中好大眉四方眉半額城  
中好廣袖四方用匹帛

張衡同聲歌一首

邂逅承際會偶得充後房情好新交接恐矜若探湯不  
才勉自竭賤妾職所當綢繆主中饋奉禮助蒸嘗思為  
苑弱席在下蔽匡牀願為羅衾幃在上衛風霜洒埽清  
枕席靚芬以狄香重戶結金局高下華鐙光衣解巾粉  
御列圖陳枕張素女為我師儀態盈萬方衆夫所希見  
天老教軒皇樂莫斯夜樂沒齒焉可忘

秦嘉贈婦詩三首

并序

秦嘉字士會隴西人也為郡上掾其妻徐淑寢疾還家

不獲面別贈詩云爾

人生譬朝露居世多屯蹇憂艱常早至惟會常苦晚念  
當奉時役去爾日遙遠遣車迎子還空往復空返省書  
情悽愴臨食不能飯獨坐空房中誰與相勸勉長夜不  
能眠伏枕獨展轉憂來如尋環匪席不可捲

皇靈無私親為善荷天祿傷我與爾身少小罹焚獨既  
得結大義惟樂若不足念當遠離別思念叙款曲河廣  
無舟梁道近隔邱陸臨陸懷惆悵中駕正踟躕浮雲起

高山悲風激深谷良馬不回鞍輕車不轉轂針藥可屢  
進愁思難為數貞士篤終始恩義不可屬

蕭蕭僕夫征鏘鏘揚和鈴清晨當引邁東帶待鷄鳴顧  
看空室中髣髴想姿形一別懷萬恨起坐為不寧何用  
敘我心遺思致款誠寶釵可耀首明鏡可鑒形芳香去  
垢穢素琴有清聲詩人感木瓜乃欲答瑤瓊彼贈我  
厚慙此往物輕雖知未足報貴用敘我情

秦嘉妻徐淑答詩一首

妾身兮不令嬰疾兮來歸沈滯兮家門歷時兮不差曠  
廢兮侍覲情敬兮有違君今兮奉命遠適兮京師悠悠  
兮離別無因兮敘懷瞻望兮踴躍佇立兮徘徊思君兮  
感結夢想兮容輝君發兮引邁去我兮日垂恨無兮羽  
翼高飛兮相追長吟兮永歎淚下兮霑衣

蔡邕飲馬長城窟行一首

青青河邊草綿綿思遠道遠道不可思宿昔夢見之夢  
見在我傍忽覺在他鄉他鄉各異縣展轉不相見枯桑

知天風海水知天寒入門各自媚誰肯相為言客從遠  
方來遺我雙鯉魚呼兒烹鯉魚中有尺素書長跪讀素  
書書上竟何如上有加飧食下有長相憶

陳琳飲馬長城窟行一首

飲馬長城窟水寒傷馬骨往謂長城吏慎莫稽留太原  
卒官作自有程舉築諧汝聲男兒寧當格鬪死何能怫  
鬱築長城長城何連連連連三千里邊城多健少內舍  
多寡婦作書與內舍便嫁莫留住善事新姑嫜時時念

我故夫子報書往邊地君今出語一何鄙身在禍難中  
何為稽留他家子生男慎莫舉生女哺用脯君獨不見  
長城下死人骸骨相撐拄結髮行事君慊慊心意關邊  
地苦賤妾何能久自全

繁欽定情詩一首

我出東門遊邂逅承清塵思君即幽房侍寢執衣巾時  
無桑中契迫此路側人我即媚君姿君亦悅我顏何以  
致拳拳綰臂雙金鏤何以致殷勤約指一雙銀何以致



區區耳中雙明珠何以致叩叩香囊繫肘後何以致契  
闊繞腕雙跳脫何以結恩情珮玉綴羅纓何以結中心  
素縷連雙針何以結相於金薄畫搔頭何以慰別離耳  
後璫瑣釵何以答歡悅紉素三條裾何以結愁悲白絹  
雙中衣與我期何所乃期東山隅日旰兮不至谷風吹  
我襦遠望無所見涕泣起時嶠與我期何所乃期山南  
陽日中兮不來凱風吹我裳逍遙莫誰覩望君愁我腸  
與我期何所乃期西山側日夕兮不來躑躅長歎息遠

望涼風至俯仰正衣服與我期何所乃期山北岑日暮  
兮不來淒風吹我衿望君不能坐悲苦愁我心愛身以  
何為惜我華色時中情既款款然後尅密期褰衣躡茂  
草謂君不我欺廁此醜陋質徒倚無所之自傷失所欲  
淚下如連絲

古詩無名人為焦仲卿妻作

并序

漢末建安中廬江府小吏焦仲卿妻劉氏為仲卿母所  
遣自誓不嫁其家逼之乃沒水而死仲卿聞之亦自縊

於庭樹時傷之為詩云爾

孔雀東南飛五里一徘徊十三能織素十四學裁衣十五彈箏篴十六誦詩書十七為君婦心中常苦悲君既為府吏守節情不移鷄鳴入機織夜夜不得息三日斷五疋大人故嫌遲非為織作遲君家婦難為妾不堪驅使徒留無所施便可白公姥及時相遣歸府吏得聞之堂上啓阿母兒已薄祿相幸復得此婦結髮同枕席黃泉共為友共事二三年始爾未為久女行無偏斜何意

致不厚阿母謂府吏何乃太區區此婦無禮節舉動自  
專由吾意久懷忿汝豈得自由東家有賢女自名秦羅  
敷可憐體無比阿母為汝求便可速遣之遣之慎莫留  
府吏長跪荅伏惟啓阿母今若遣此婦終老不復取阿  
母得聞之槌牀便大怒小子無所畏何敢助婦語吾已  
失恩義會不相從許府吏默無聲再拜還入戶舉言謂  
新婦哽咽不能語我自不驅卿逼迫有阿母卿但暫還  
家吾今且報府不久當歸還還必相迎取以此下心意

慎勿違吾語新婦謂府吏勿復重紛紜往昔初陽歲謝  
家來貴門奉事循公姥進止敢自專晝夜勤作息伶俜  
縈苦辛謂言無罪過供養卒大恩仍更被驅遣何言復  
來還妾有繡腰襦菱蕤自生光紅羅複斗帳四角垂香  
囊箱簾六七十綠碧青絲繩物物各自異種種在其中  
人賤物亦鄙不足迎後人留待作遺施於今無會因時  
時為安慰久久莫相忘雞鳴外欲曙新婦起嚴妝著我  
繡袂褰事事四五通足下躡絲履頭上瑇瑁光腰若流

紈素耳著明月璫指如削蔥根口如含朱丹纖纖作細  
步精妙世無雙上堂拜阿母母聽去不止昔作女兒時  
生小出野里本自無教訓兼媿貴家子受母錢帛多不  
堪母驅使今日還家去念母勞家裏却與小姑別淚落  
連珠子新婦初來時小姑如我長勤心養公姥好自相  
扶將初七及下九嬉戲莫相忘出門登車去涕落百餘  
行府吏馬在前新婦車在後隱隱何甸甸俱會大道口  
下馬入車中低頭共耳語誓不相隔鄉且暫還家去吾

今且赴府不久當還歸誓天不相負新婦謂府吏感君  
區區懷君既若見錄不久望君來君當作盤石妾當作  
蒲葦蒲葦絢如絲盤石無轉移我有親父兄性行暴如  
雷恐不任我意逆以煎我懷舉手長勞勞二情同依依  
入門上家堂進退無顏儀阿母大拊掌不圖子自歸十  
三教汝織十四能裁衣十五彈箏篴十六知禮儀十七  
遣汝嫁謂言無誓違汝今無罪過不迎而自歸蘭芝慙  
阿母兒實無罪過阿母大悲摧還家十餘日縣令遣媒

來云有第三郎窈窕世無雙年始十八九便言多令才  
阿母謂阿女汝可去應之阿女銜淚荅蘭芝初還時府  
吏見丁寧結誓不別離今日違情義恐此事非奇自可  
斷來信徐徐更謂之阿母白媒人貧賤有此女始適還  
家門不堪吏人婦豈合令郎君幸可廣問訊不得便相  
許媒人去數日尋遣丞請還說有蘭家女承籍有宦官  
云有第五郎嬌逸未有婚遣丞為媒人主簿通語言直  
說太守家有此令郎君既欲結大義故遣來貴門阿母



謝媒人女子先有誓老姥豈敢言阿兄得聞之悵然心  
中煩舉言為阿妹作計何不量先嫁得府吏後嫁得郎  
君否泰如天地足以榮汝身不嫁義郎體其往欲何云  
蘭芝仰頭答理實如兄言謝家事夫壻中道還兄門處  
分適兄意那得自任專雖與府吏要渠會永無緣登即  
相許和便可結婚姻媒人下牀去諾諾復爾爾還部白  
府君下官奉使命言談大有緣府君得聞之心中大歡  
喜視歷復開書便利此月內六合正相應良吉三十日

今已二十七卿可去成婚交語速裝束駱驛如浮雲青  
雀白鵲舫四角龍子幡婀娜隨風轉金車玉作輪躑躅  
青驄馬流蘇金鏤鞍齎錢三百萬皆用青絲穿雜綵三  
百匹交廣市鮭珍從人四五百鬱鬱登郡門阿母謂阿  
女適得府君書明日來迎汝何不作衣裳莫令事不舉  
阿女默無聲手巾掩口唬淚落便如瀉移我瑠璃榻出  
置前窓下左手持刀尺右手執綾羅朝成繡袂褰晚成  
單羅衫掩掩日欲暝愁思出門唬府吏聞此變因求假

暫歸未至二三里催藏馬悲哀新婦識馬聲躡履相逢  
迎悵然遙相望知是故人來舉手拍馬鞍嗟嘆使心傷  
自君別我後人事不可量果不如先願又非君所詳我  
有親父母逼迫兼弟兄以我應他人君還何所望府吏  
謂新婦賀卿得高遷盤石方且厚可以卒千年蒲葦一  
時紉便作旦夕間卿當日勝貴吾獨向黃泉新婦謂府  
吏何意出此言同是被逼迫君爾妾亦然黃泉下相見  
勿違今日言執手分道去各各還家門生人作死別恨

恨那可論念與世間辭千萬不復全府吏還家去上堂  
拜阿母今日大風寒寒風摧樹木嚴霜結庭蘭兒今日  
冥冥令母在後單故作不良計勿復怨鬼神命如南山  
石四體康且直阿母得聞之零淚應聲落汝是大家子  
仕宦於臺閣慎勿為婦死貴賤情何薄東家有賢女窈  
窕豔城郭阿母為汝求便復在旦夕府吏再拜還長嘆  
空房中作計乃爾立轉頭向戶裏漸見愁煎迫其日牛  
馬嘶新婦入青廬蒼蒼黃昏後寂寂人定初我命絕今

日魂去尸長留攬屢脫絲履舉身赴青池府吏聞此事  
心知長別離徘徊庭樹下自挂東南枝兩家求合葬合  
葬華山傍東西植松柏左右種梧桐枝枝相覆蓋葉葉  
相交通中有雙飛鳥自名為鴛鴦仰頭相向鳴夜夜達  
五更行人駐足聽寡婦起傍徨多謝後世人戒之慎勿

忘

玉臺新詠卷一

欽定四庫全書

玉臺新詠卷二

陳 徐陵 撰

魏文帝於清河見輓船士新婚與妻別一首

又於清河作一首

又甄皇后樂府塘上行一首

劉勰妻王氏雜詩二首

并序

曹植雜詩五首

樂府三首

棄婦詩一首

魏明帝樂府二首

阮籍詠懷詩二首

傅玄樂府詩七首

和班氏詩一首

張華情詩五首

雜詩二首



潘岳內顧詩二首

悼亡詩二首

石崇王昭君辭一首

并序

左思嬌女詩一首

魏文帝於清河見輓船士新婚與妻別一首

與君結新婚宿昔當別離涼風動秋草蟋蟀鳴相隨冽  
冽寒蟬吟蟬吟抱枯枝枯枝時飛揚身體忽遷移但惜  
歲月馳歲月無窮極會合安可知願為雙黃鵠比翼戲

清池

又清河作一首

方舟戲長水湛澹自浮沈  
弦歌發中流悲響有餘音  
音聲入君懷悽愴傷人心  
心傷安所念但願恩情深  
願為鷗風鳥雙飛翔北林

又甄皇后樂府塘上行一首

蒲生我池中其葉何離離  
離傍能行仁義莫若妾自知  
衆口鑠黃金使君生別離  
念君去我時獨愁常苦悲想見

君顏色感結傷心脾念君常苦悲夜夜不能寐莫以豪  
賢故棄捐素所愛莫以魚肉賤棄捐蔥與薤莫以麻枲  
賤棄捐菅與蒯出亦復苦愁入亦復苦愁邊地多悲風  
樹木何修修從軍致獨樂延年壽千秋

劉勲妻王氏雜詩二首

并序

王宋者平虜將軍劉勲妻也入門二十餘年後勲悅山  
陽司馬氏女以宋無子出之還於道中作詩二首

翩翩牀前帳張以蔽光輝昔將爾同去今將爾共歸緘

藏篋笥裏當復何時披

誰言去婦薄去婦情更重千里不唾井況乃昔所奉遠  
望未為遙峙嶠不得往

曹植雜詩五首

明月照高樓流光正徘徊上有愁思婦悲歎有餘哀借  
問歎者誰言是客子妻君行踰十年孤妾常獨棲君若  
清路塵妾若濁水泥浮沉各異勢會合何時諧願為西  
南風長逝入君懷君懷時不閒妾心當何依

西北有織婦綺縞何繽紛明晨東機杼日昃不成文大  
息終長夜悲嘯入青雲妾身守空房良人行從軍自期  
三年歸今已歷九春孤鳥繞樹翔嗷嗷鳴索羣願為南  
流景馳光見我君

微陰翳陽景清風飄我衣遊魚潛綠水翔鳥薄天飛眇  
眇客行士遠役不得歸始出嚴霜結今來白露晞遊子  
歎黍離處者歌式微慷慨對嘉賓悽愴內傷悲

攬衣出中閨逍遙步兩楹閒房何寂寞綠草被階庭空

室自生風百鳥翔南征春思安可忘憂戚與我并佳人  
在遠道妾身獨單慙歡會難再遇蘭芝不重榮人皆棄  
舊愛君豈若平生寄松為女蘿依水如浮萍束身奉衿  
帶朝夕不墮傾儻願終盼眄永副我中情

南國有佳人容華若桃李朝遊江北岸夕宿瀟湘汜時  
俗薄朱顏誰為發皓齒俛仰歲將暮榮曜難久恃

樂府三首

美女妖且閑采桑岐路間長條紛冉冉落葉何翩翩攘

袖見素手皓腕約金環頭上金爵釵腰佩翠琅玕明珠  
交玉體珊瑚間木難羅衣何飄飄輕裾隨風還顧眄遺  
光彩長嘯氣若蘭行徒用息駕休者以忘餐借問女安  
居乃在城南端青樓臨大路高門結重關容華暉朝日  
誰不希令顏媒氏何所營玉帛不時安佳人慕高義求  
賢良獨難衆人何嗷嗷安知彼所歡盛年處房室中夜  
起長歎 美女篇

種葛南山下葛蔓自成陰與君初婚時結髮恩義深歡

愛在枕席宿昔同衣衾竊慕棠棣篇好樂和瑟琴行年  
將晚暮佳人懷異心思絕曠不接我情遂抑沈出門當  
何顧徘徊步北林下有交頸獸仰見雙棲禽攀枝長歎  
息淚下霑羅衿良鳥知我悲延頸對我吟昔為同池魚  
今若商與參往古皆歡遇我獨困於今棄置委天命愁  
愁安可任 種葛篇

浮萍寄清水隨風東西流結髮辭嚴親來為君子仇恪  
勤在朝夕無端獲罪尤在昔蒙恩惠和樂如瑟琴何意



今摧積曠若商與參茱萸自有芳不若桂與蘭新人雖  
可愛無若故所歡行雲有反期君恩儻中還慊慊仰天  
歎愁愁將何愬日月不常處人生忽若過悲風來入懷  
淚下如垂露發篋造裳衣裁縫紉與素 浮萍篇

棄婦詩一首

石榴植前庭綠葉搖縹青丹華灼烈烈帷彩有光榮光  
好曄流離可以戲淑靈有鳥飛來集樹翼以悲鳴悲鳴  
夫何為丹華實不成拊心長歎息無子當歸寧有子月

經天無子若流星天月相終始流星沒無精棲遲失所  
宜下與瓦石并憂懷從中來歎息通雞鳴反側不能寐  
逍遙於前庭峙嶠還入房肅肅帷幕聲褰帷更攝帶撫  
弦彈素箏慷慨有餘音要妙悲且清收淚長歎息何以  
負神靈招搖待霜露何必春夏成晚穫為良實願君且  
安寧

魏明帝樂府詩二首

昭昭素明月暉光燭我牀憂人不能寐耿耿夜何長微

風衝閨閣羅帷自飄颻攬衣曳長帶縱履下高堂東西  
安所之徘徊以傍徨春鳥向南飛翩翩獨翱翔悲聲命  
儔匹哀鳴傷我腸感物懷所思泣涕忽霑裳

種瓜東井上冉冉自踰垣與君新為婚瓜葛相結連寄  
託不肖軀有如倚太山菟絲無根株蔓延自登緣萍藻  
託清流常恐身不全感君邱山惠賤妾執拳拳天日照  
知之想君亦俱然

阮籍詠懷詩二首

二妃遊江濱逍遙從風翔交甫解環珮婉孌有芬芳猗  
靡情懽愛千載不相忘傾城迷下蔡容好結中腸感激  
生憂思萱草樹蘭房膏沐為誰施其雨怨朝陽如何金  
石交一旦更離傷

昔日繁華子安陵與龍陽天天桃李花灼灼有暉光悅  
懽若九春磬折似秋霜流眄發媚姿言笑吐芬芳攜手  
等懽愛宿昔同衾裳願為雙飛鳥比翼共翱翔丹青著  
明誓永世不相忘

傅玄樂府詩七首

青青河邊草悠悠萬里道草生在春時遠道還有期春  
至草不生期盡歎無聲感物懷思心夢想發中情夢君  
如鴛鴦比翼雲間翔既覺寂無見曠如參與商河洛自  
用固不如中岳安回流不及反浮雲往自還悲風動思  
心悠悠誰知者懸景無停居忽如馳駟馬傾耳懷音響  
轉目淚雙墮生存無會期要君黃泉下 青青河邊草

篇

苦相身為女卑陋難再陳兒男當門戶墮地自生神雄  
心志四海萬里望風塵女育無欣愛不為家所珍長大  
逃深室藏頭羞見人無淚適他鄉忽如雨絕雲低頭和  
顏色素齒結朱脣跪拜無復數婢妾如嚴賓情合同雲  
漢葵藿仰陽春心乖甚水火百惡集其身玉顏隨年變  
丈夫多好新昔為形與影今為越與秦越秦時相見一  
絕踰參辰 苦相篇 豫章行

有女懷芬芳媿媿步東箱蛾眉分翠羽明目發清揚丹

脣翳皓齒秀色若珪璋巧笑露權厯衆媚不可詳容儀  
希世出無乃古毛嬙頭安金步搖耳繫明月璫珠環約  
素腕翠爵垂鮮光文袍綴藻黼玉體映羅裳容華旣以  
豔志節擬秋霜徽音冠青雲聲響流四方妙哉英媛德  
宜配侯與王靈應萬世合日月時相望媒氏陳東帛羔  
鴈鳴前堂百兩盈中路起若鸞鳳翔兄夫徒踴躍望絕  
殊參商 有女篇 豔歌行

昭昭朝時日皎皎晨明月十五入君門一別終華髮同

心忽異離曠如秦與越秦越有會時參辰遠且闊形影  
無髣髴音聲寂無達纖弦感促柱觸之哀聲發情思如  
循環憂來不可遏塗山有餘恨詩人詠采葛蜻蛚吟林  
下回風起幽閨春榮隨露落芙蓉生木末自傷命不遇  
良辰永乖別已爾可奈何譬如紉素裂孤雌翔故巢星  
流光景絕魂神馳萬里甘心要同穴 朝時篇 怨歌  
行

皎皎明月光灼灼朝日暉昔為春繭絲今為秋女衣丹



脣列素齒翠彩發娥眉嬌子多好言歡合易為安玉顏  
盛有時秀色隨年衰常恐新間舊變故興細微浮萍無  
根本非水將何依憂喜更相接樂極自還悲 明月篇  
秋蘭蔭玉池池水清且芳芙蓉隨風發中有雙鴛鴦雙  
魚自踴躍兩鳥時回翔君期歷九秋與妾同衣裳 秋  
蘭篇

所思兮何在乃在西長安何用存問妾香橙雙珠環何  
用重存問羽爵翠琅玕今我兮聞君更有兮異心香亦

不可燒環亦不可沈香燒日有歇環沈日自深  
西長  
安行

和班氏詩一首

秋胡納令室三日宦他鄉皎皎潔婦姿泠泠守空房  
嫵不終夕別如參與商憂來猶四海易感難可防人言  
生日短愁者苦夜長百草揚春華攘腕采柔桑素手尋  
繁枝落葉不盈筐羅衣翳玉體回目流彩章君子倦仕  
歸車馬如龍驤精誠馳萬里既至兩相忘行人悅令顏

請息此樹傍誘以逢郎喻遂下黃金裝烈烈貞女忿言  
辭厲秋霜長驅及居室奉金升北堂母立呼婦來歡情  
樂未央秋胡見此婦惕然懷探湯負心豈不慙永誓非  
所望清濁必異源鳬鳳不並翔引身赴長流果哉潔婦  
腸彼夫既不淑此婦亦大剛

張華情詩五首

北方有佳人端坐鼓鳴琴終晨撫管弦日夕不成音憂  
來結不解我思存所欽君子尋時役幽妾懷苦心初為

三載別於今久滯淫昔邪生戶牖庭內自成林翔鳥鳴  
翠隅草蟲相和吟心悲易感激俛仰淚流衿願託鷓鴣風  
翼束帶侍衣衾

明月曜清景朧光照玄墀幽人守靜夜回身入空帷束  
帶俟將朝廓落晨星稀寐假交精爽覲我佳人姿巧笑  
媚權靨聯媚眸與眉寐言增長歎悽然心獨悲

清風動帷簾晨月燭幽房佳人處遐遠蘭室無容光衿  
懷擁虛景輕衾覆空牀居懽惜夜促在感怨宵長撫枕

獨吟歎綿綿心內傷

君居北海陽妾在南江陰懸邈修塗遠山川阻且深承  
驩注隆愛結分投所欽銜思守篤義萬里託微心

遊自四野外逍遙獨延佇蘭蕙緣清渠繁華蔭綠渚佳  
人不在茲取此欲誰與巢居覺風飄穴處識陰雨未曾  
遠別離安知慕儔侶

雜詩二首

逍遙遊春宮容與綠池阿白蘋齊素葉朱草茂丹華微

風搖菰若增波動芰荷  
榮彩曜中林流馨入綺羅  
王孫遊不歸脩途邈以遐  
誰與翫遺芳佇立獨咨嗟

荏苒日月運寒暑忽流易  
同好遊不存苔苔遠離析  
房櫳自來風戶庭無行迹  
蕭葭生牀下蛛蝥網四壁  
懷思豈不隆感物重鬱積  
遊鴈比翼翔歸鴻知接翮  
來哉彼君子無愁徒自隔

潘岳內顧詩二首

靜居懷所歡登城望四澤  
春草鬱青青桑柘何奕奕  
芳

林振朱紫綠水激素石初征冰未泮忽焉振絺綌漫漫  
三千里蒼蒼遠行客馳情戀朱顏寸陰過盈尺夜愁極  
清晨朝悲終日夕山川信悠永願言良弗獲引領訊歸  
雲沈思不可釋

獨悲安所慕人生若朝露綿邈寄絕域眷戀想平素爾  
情既來追我心亦還顧形體隔不達精爽交中路不見  
山上松隆冬不易故不見陵澗柏歲寒守一度無謂希  
是疎在遠分彌固

悼亡詩二首

荏苒冬春謝寒暑忽流易之子歸窮泉重壤永幽隔私  
懷誰克從淹留亦何益僂俛恭朝命回心反初役望廬  
思其人入室想所歷幃屏無髣髴翰墨有餘迹流芳未  
及歇遺挂猶在壁帳幔如或存回遑忡驚惕如彼翰林烏  
雙棲一朝隻如彼遊川魚比目中路析春風緣隙來晨  
雷依簷滴寢息何時忘沈憂日盈積庶幾有時衰壯缶  
猶可擊



皦皦窓中月照我室南端清商應秋至溽暑隨節闌  
瘳涼風升始覺夏衾單豈曰無重纊誰與同歲寒歲寒  
無與同朗月何朧朧展轉眄枕席長簟竟牀空牀空委  
清塵室虛來悲風獨無李氏靈彷彿覩爾容撫衿長歎  
息不覺涕霑霑霑安能已悲懷從中起寢興自存形  
遺音猶在耳上慙東門吳下媿蒙莊子賦詩欲言志零  
落難具紀命也詩奈何長戚自令鄙

石崇王昭君辭一首

并序

王明君者本為王昭君以觸文帝諱故改匈奴盛請婚於漢元帝以後宮良家女子明君配焉昔公主嫁烏孫令琵琶馬上作樂以慰其道路之思其送明君亦必爾也其造新之曲多哀怨之聲故敘之於紙云爾

我本漢家子將適單于庭辭訣未及終前驅已抗旂僕御涕流離轅馬為悲鳴哀鬱傷五內泣淚霑珠纓行行日已遠乃造匈奴城延我於穹廬加我閼氏名異國非所安雖貴非所榮父子見陵辱對之慙且驚殺身良未

易默默以苟生苟生亦何聊積思常憤盈願假飛鴻翼  
棄之以遐征飛鴻不我顧佇立以屏營昔為匣中玉今  
為糞上英朝華不足歡甘為秋草并傳語後世人遠嫁  
難為情

左思嬌女詩一首

吾家有嬌女皎皎頗白皙小字為紉素口齒自清歷鬢  
髮覆廣額雙耳似連璧明朝弄梳臺黛眉類埽跡濃朱  
行丹脣黃吻瀾漫赤嬌語若連瑣忿速乃明愷握筆利

彤管篆刻未期益執書愛綈素誦習矜所獲具妙字惠  
芳面目睒如畫輕莊喜縷邊臨鏡忘紡績舉觴擬京兆  
立的成復易玩弄眉頰間劇兼機杼役從容好趙舞延  
袖像飛翮上下弦柱際文史輒卷襞顧眄屏風畫如見  
已指擿丹青日塵闇明義為隱蹟馳驚翔園林菓下皆  
生摘紅葩掇紫蒂萍實驟抵擲貪華風雨中倏眒數百  
適務躡霜雪戲重綦常累積并心注肴饌端坐理盤榻  
翰墨戢函按相與數離遯動為鑪鉦屈屣履任之適止

為茶菽據吹吁對鼎鑊脂膩漫白袖烟熏染珂錫衣被  
皆重池難與次水碧任其孺子意羞受長者責瞥聞當  
與杖掩淚俱向壁

玉臺新詠卷二

欽定四庫全書

玉臺新詠卷三

陳徐陵撰

陸機擬古七首

為顧彥先贈婦二首

周夫人贈車騎一首

樂府三首

陸雲為顧彥先贈婦往反四首

張協雜詩一首

楊方合歡詩五首

王鑒七夕觀織女詩一首

李充嘲友人一首

曹毗夜聽擣衣一首

陶潛擬古詩一首

荀昶樂府詩二首

王微雜詩二首



謝惠連雜詩三首

劉鑠雜詩五首

陸機擬古七首

高樓一何峻  
蒼蒼峻而安  
綺窓出塵冥  
飛階躡雲端  
佳人撫琴瑟  
纖手清且閑  
芳草隨風結  
哀響馥若蘭  
玉容誰能顧  
傾城在一彈  
佇立望日昃  
躑躅再三歎  
不怨佇立久  
但願歌者歡  
思駕歸鴻羽  
比翼雙飛翰  
擬西北有高樓

西山何其峻曾曲鬱崔嵬零露彌天墜蕙葉憑林衰寒  
暑相因襲時逝忽如遺三閭結飛轡大壑悲落暉曷為  
牽世務中心悵有違京雒多妖麗玉顏倅瓊蕤閒夜撫  
鳴琴惠音清且悲長歌赴促節哀響逐高徽一唱萬夫  
歡再唱梁塵飛思為河曲鳥雙遊豐水湄擬東城高  
且長

嘉樹生朝陽凝霜封其條執心守時信歲寒不敢凋美  
大何其曠灼灼在雲霄隆想彌年時長嘯入風飄引領

望天末譬彼向陽翹  
擬蘭若生春陽

灼灼天漢暉粲粲光  
天步牽牛西北回  
織女東南顧華容  
一何綺揮手如振素  
怨彼河無梁悲此年  
歲暮跂彼無良緣  
睨焉不得度引領望  
大川雙涕如沾露  
擬苔牽牛星

靡靡江離草熠燿生  
河側皎皎彼姝女  
阿那當軒織粲粲  
妖容姿灼灼華美  
色良人遊不歸偏  
棲獨隻翼空房來  
悲風中夜起歎息  
擬青青河畔草

歡友蘭時往  
苔苔匿音微  
虞淵引絕景  
四節遊若飛  
芳草久已茂  
佳人竟不歸  
躑躅遵林渚  
惠風入我懷  
感物應所歡  
采此欲貽誰  
擬庭中有奇樹

上山采瓊藥  
穹谷饒芳蘭  
采采不盈掬  
悠悠懷所歡  
故鄉一何曠  
山川阻且難  
沈思鐘萬里  
躑躅獨吟歎  
擬涉江采芙蓉

為顧彥先贈婦二首

辭家遠行遊  
悠悠三千里  
京洛多風塵  
素衣化為緇  
循

身悼憂苦感念同懷子隆思亂心曲沈歎滯不起歡沈  
難克興心亂誰為理願假歸鴻翼翻飛浙江汜

東南有思婦長歎充幽閨借問歎何為佳人眇天末遊  
宦人不歸山川修且闊形影參商乖音息曠不達離合  
非有常譬彼弦與筈願保金石志慰妾長飢渴

周夫人贈車騎一首

碎碎織細練為君作縞襦君行豈有顧憶君是妾夫昔  
者得君書聞君在高平今時得君書聞君在京城京城

華麗所璀璨多異端男兒多遠志豈知妾念君昔者與  
君別歲事薄將暮日月一何速素秋墜湛露湛露何冉  
冉思君隨歲晚對食不能飡臨觴不能飯

樂府三首

扶桑升朝暉照此高臺端高臺多妖麗洞房出清顏淑  
貌曜皎日惠心清且閑美目揚玉澤蛾眉象翠翰鮮膚  
一何潤秀色若可餐窈窕多容儀婉媚巧笑言暮春春  
服成粲粲綺與紉金雀垂藻翹瓊珮結瑤璫方駕揚清

塵濯足洛水瀾藹藹風雲會佳人一何繁南崖充羅幕  
北渚盈軒軒清川含藻影高岸被華丹馥馥芳袖揮泠  
泠纖指彈悲歌吐清響雅舞播幽蘭丹脣含九秋妍迹  
凌七盤赴曲迅驚鴻蹈節如集鸞綺態隨顏變沈姿無  
定源俯仰紛阿那顧步咸可歡遺芳結飛颺浮景映清  
湍冶容不足詠春遊良可歎 豔歌行

遊僊聚靈族高會曾城阿長風萬里舉慶雲鬱嵯峨宓  
妃興洛浦王韓起泰華北微瑤臺女南要湘川娥肅肅

宵駕動翩翩翠蓋羅羽旗棲瓊鸞玉衡吐鳴和太容揮  
高弦洪崖發清歌獻酬既已周輕舉垂紫霞總轡扶桑  
枝濯足湯谷波清暉溢天門垂慶惠皇家 前緩聲歌  
江籬生幽渚微芳不足宣被蒙風雨會移居華池邊發  
藻玉臺下垂影滄浪淵霑潤既已渥結根與且堅四節  
逝不處華繁難久鮮淑氣與時殞餘芳隨風捐天道有  
遷易人理無常全男懼智傾愚女愛衰避妍不惜微軀  
退但懼蒼蠅前願君廣末光照妾薄暮年 塘上行



陸雲為顧彥先贈婦往反四首

我在三川陽子居五湖陰山海一何曠譬彼飛與沈目  
想清惠安耳存淑媚音獨寐多遠念寤言撫空衿彼美  
同懷子非爾誰為心

悠悠君行邁梵梵妾獨止山河安可踰永路隔萬里京  
室多妖冶粲粲都人子雅步媚纖腰巧笑發皓齒佳麗  
良可美衰賤焉足紀遠蒙眷顧言銜恩非望始

翩翩飛蓬征郁郁寒木榮遊止固殊性浮沉豈一情隆

愛結在昔信誓貫三靈秉心金石固豈從時俗傾美目  
逝不顧纖腰徒盈盈何用結中款仰指北辰星

浮海難為水遊林難為觀容色貴及時朝華忌日晏皎  
皎彼姝子灼灼懷春粲西城善雅舞總章饒清彈鳴簧  
發丹脣朱弦繞素腕輕裾猶電揮雙袂如霞散華容溢  
藻幄哀響入雲漢知音世所希非君誰能讚棄置北辰  
星問此玄龍煥時暮復何言華落理必賤

張協雜詩一首

秋夜涼風起清氣蕩暄濁蜻蛚吟階下飛蛾拂明燭君  
子從遠役佳人守梵獨離居幾何時鑽燧忽改木房櫳  
無行迹庭草萋已綠青苔依空牆蜘蛛網四屋感物多  
所懷沈憂結心曲

楊方合歡詩五首

虎嘯谷風起龍躍景雲浮同聲好相應同氣自相求我  
情與子親譬如影追軀食共並根穗飲共連理枯衣用  
雙絲絹寢共無縫絢居願接膝坐行願攜手趨子靜我

不動子遊我無留齊彼同心鳥譬此比目魚情至斷金石膠漆未為牢但願長無別合形作一軀生為併身物死為同棺灰秦氏自言至我情不可儔

磁石招長針陽燧下炎煙宮商聲相和心同自相親我情與子合亦如影追身寢共織成被絮用同功綿暑搖比翼扇寒坐併肩氈子笑我必哂子感我無懼來與子共迹去與子同塵齊彼蛭蛭獸舉動不相捐惟願長無別合形作一身生有同室好死成併棺民徐氏自言至

我情不可陳

獨坐空室中愁有數千端悲響答愁歎  
哀涕應苦言彷徨四顧望白日入西山  
不覩佳人來但見飛鳥還飛鳥亦何樂  
夕宿自作羣

飛黃銜長轡翼翼回輕輪俯涉綠水澗  
仰過九層山修途曲且險秋草生兩邊  
黃華如沓金白華如散銀青敷羅翠彩  
絳葩象赤雲爰有承露枝紫榮合素芬  
扶疎垂清藻布翹芳且鮮目為豔彩回  
心為奇色旋撫心悼孤

客俯仰還自憐峙嶠向壁歎攬筆作此文

南隣有奇樹承春挺素華豐翹被長條綠葉蔽朱柯因  
風吐微音芳氣入紫霞我心羨此樹願徙着余家夕得  
遊其下朝得弄其葩爾根深且堅余宅淺且洿移植良  
無期歎息將如何

王鑒七夕觀織女一首

牽牛悲殊館織女悼離家一稔期一宵此期良可嘉赫  
奕玄門開飛閣鬱嵯峨隱隱驅千乘閶闔越星河六龍

奮瑤轡文螭負瓊車火闌秉瑰燭素女執瓊華絳旗若  
吐電朱蓋如振霞雲韶何嘈噉靈鼓鳴栢和亭軒紆高  
盼春子在岌峩澤因芳露霑恩附蘭風加明發相從遊  
翩翩鸞鷟羅同遊不同觀念子憂怨多敬因三祝末以  
爾屬皇娥

李充朝友人一首

同好齊歡愛纏綿一何深子既識我情我亦知子心  
婉歷年歲和樂如瑟琴良辰不我俱中關似商參爾隔

北山陽我分南川陰嘉會罔克從積思安可任目想妍  
麗姿耳存清媚音修晝興永念遙夜獨悲吟逝將尋行  
役言別涕霑衿願爾降玉趾一顧重千金

曹毗夜聽擣衣一首

寒興御紈素佳人理衣襟冬夜清且永皓月照堂陰纖  
手疊輕素朗杵叩鳴砧清風流繁節回飈灑微吟嗟此  
往運速悼彼幽滯心二物感余懷豈但聲與音

陶潛擬古一首



日暮天無雲春風扇微和佳人美清夜達曙酣且歌歌  
竟長歎息持此感人多明明雲間月灼灼葉中花豈無  
一時好不久當如何

荀昶樂府二首

朝發邯鄲邑暮宿井陘間井陘一何狹車馬不得旋迴  
迴相逢值崎嶇交一言一言不容多伏軾問君家君家  
誠難知難知復易博南面平原居北趨相如閣飛樓臨  
夕都通門枕華郭入門無所見但見雙棲鶴棲鶴數十

雙鴛鴦羣相追大兄珥金鐙中兄振纓綏伏臘二來歸  
隣里生光輝小弟無所作鬪雞東陌達大婦織紵綺中  
婦縫羅衣小婦無所作挾瑟弄音徽丈人且却坐梁塵  
將欲飛擬相逢狹路間

熒熒山上火苕苕隔隴左隴左不可至精爽通寤寐寤  
寐衾幘同忽覺在他邦他邦各異邑相逐不相及迷墟  
在望煙木落知冰堅升朝各自進誰肯相攀牽客從北  
方來遺我端弋絺命僕開弋絺中有隱起珪長跼讀隱

珪辭苦聲亦悽上言各努力下言長相懷  
擬青青河邊草

王微雜詩二首

桑妾獨何懷傾筐未盈把自言悲苦多排却不肯捨妾  
悲叵陳訴填憂不消冶寒鴈歸所從半塗失憑假壯情  
抃驅馳猛氣捍朝社常懷雪漢慙常欲復周雅重名好  
銘勒輕軀願圖寫萬里度沙漠懸師蹈朔野傳聞兵失  
利不見來歸者奚處理旂麾何處喪車馬拊心悼恭人

零淚覆面下徒謂久別離不見長孤寡寂寂揜高門寥  
寥空廣廈待君竟不歸收顏今就櫬

思婦臨高臺長想憑華軒弄弦不成曲哀歌送苦言箕  
帚留江介良人處鴈門詎憶無衣苦但知狐白溫日暗  
牛羊下野雀滿空園孟冬寒風起東壁正中昏朱火獨  
照人抱景自愁怨誰知心曲亂所思不可論

謝惠連雜詩三首

落日隱簷楹升月照房櫳團團滿葉露析析振條風蹀

足循廣塗瞬目曬曾穹雲漢有靈匹彌年闕相從遐川  
阻暱愛脩渚曠清容弄杼不成彩聳轡驚前蹤昔離秋  
已兩今聚夕無雙傾河易回幹款顏難久悰沃若靈駕  
旋寂寥雲幄空留情顧華寢遙心逐奔龍沈吟為爾感  
情深意彌重 七月七日詠牛女

衡紀無淹度晷運倏如催白露滋園菊秋風落庭槐肅  
肅沙鷄羽烈烈寒蜚號夕陰結空幕宵月皓中閨美人  
戒常服端飭相招攜簪玉出北房鳴金步南階欄高砧

響發楹長杵聲哀微芳起兩袖輕汗染雙題紈素既已  
成君子行不歸裁用笥中刀縫為萬里衣盈篋自予手  
幽絨俟君開腰帶準疇昔不知今是非 擣衣

客從遠方來贈我鵠文綾貯以相思篋絨以同心繩裁  
為親身服著以俱寢興別來經年歲歡心不可凌寫酒  
置井中誰能辯斗升合如枯中水誰能判淄澠 代古

劉鑠雜詩五首

眇眇凌羨道遙遙行遠之回車背京里揮手於此辭堂

上流塵生庭中綠草滋寒蜚翔水曲秋兔依山基芳年  
有華月佳人無還期日夕涼風起對酒長相思悲發江  
南調憂委子衿詩卧看明鏡晦坐見輕紈縑淚容曠不  
飭幽鏡難復治願垂薄暮景照妾桑榆時 代行行重  
行行

落宿半遙城浮雲藹曾闕玉宇來清風羅帳延秋月結  
思想伊人沈憂懷明發誰謂行客遊屢見流芳歇河廣  
川無梁山高路難越 代明月何皎皎

白露秋風始秋風明月月初明月照高樓白露皎玄除迨  
及涼雲起行見寒林疎客從遠方至贈我千里書先敘  
懷舊愛末陳久離居一章意不盡三復情有餘願遂平  
生春無使甘言虛 代孟冬寒氣至

淒淒含露臺肅肅迎風館思女御襦軒哀心徹雲漢端撫  
悲弦泣獨對明鐙歎良人久徭役耿介終昏旦楚楚秋  
水歌依依采菱彈 代青青河畔草

秋動清氛扇火移炎氣歇廣欄含夜陰高軒通夕月安



步巡芳林傾望極雲闕組幕縈漢陳龍駕凌霄發誰云  
長河遙頗劇促筵越沈情未申寫飛光已飄忽來對眇  
難期今歡自茲沒 詠牛女

玉臺新詠卷三

欽定四庫全書

玉臺新詠卷四

陳 徐陵 撰

王僧達七夕月下一首

顏延之為織女贈牽牛七夕一首

秋胡詩九首

鮑昭雜詩九首

王素學阮步兵體一首

吳邁遠擬樂府四首

鮑令暉雜詩六首

丘巨源雜詩二首

王允長雜詩五首

謝眺雜詩十二首

陸厥中山王孺子妾歌一首

施榮泰雜詩一首

王僧達七夕月下一首

遠山斂霧侵廣庭揚月波氣往風集隙秋還露泣柯節  
期既已孱中霄振綺羅來歡詎終夕收淚泣分河

顏延之為織女贈牽牛七夕一首

婺女儷經星常娥棲飛月慙無二媛靈託身侍天闕閭  
闔殊未暉咸池豈沐髮陞陰不久張長河為誰越雖有  
促譙期方須涼風發虛計雙曜周空遲三星沒非怨杼  
軸勞但念芳菲歇

秋胡詩九首

倚梧傾高鳳寒谷待鳴律影響豈不懷自遠每相匹婉  
彼幽閑女作嬪君子室峻節貫秋霜明豔侔朝日嘉運  
既我從欣願自此畢

其一

燕居未及好良人頗有違脫巾

千里外結綬登王畿戒徒在昧旦左右來相依驅車出

郊郭行路正威遲存為久離別沒為長不歸

其二

嗟余怨

行役三陟窮晨暮嚴駕越風寒解鞍犯霜露原隰多悲

涼回飈卷高樹離獸起荒蹊驚鳥縱橫去悲哉遊宦子

勞此山川路

其三

迢遙行人遠婉轉年運徂良時為此別

日月方向除孰知寒暑積俛見榮枯歲暮臨空房涼  
風起坐隅寢興日已寒白露生庭蕪其四勤役從歸願反  
路遵山河昔辭秋未素今也歲載華蠶月觀時暇桑野  
多經過佳人從所務窈窕援高柯傾城誰不顧弭節停  
中阿其五年往誠思勞事遠闊音形雖為五載別相與昧  
平生捨車遵往路鳬藻馳目成南金豈不重聊自意所  
輕義心多苦調密此金玉聲其六高節難久淹竭來空復  
辭遲遲前途盡依依造門基上堂拜嘉慶入室問何之

日暮行采歸物色桑榆時美人望昏至慙歎前相持

其七

有懷誰能已聊用申苦難離居殊年歲一別阻河關春

來無時豫秋至恒早寒明發動愁心閨中起長歎悵悵

歲方晏日落遊子顏

其八

高張生絕弦聲急由調起自昔

枉光塵結言固終始如何久為別百行愆諸已君子失

明義誰與偕沒齒媿彼行露詩甘之長川記

其九

鮑昭雜詩九首

始見西南樓纖纖如玉鉤末映東北墀娟娟似娥眉娥



眉蔽珠櫳玉鉤隔瑣窓三五二八時千里與君同夜移  
衡漢落徘徊帷戶中歸華先委露別葉早辭風客遊厭  
辛苦仕子倦飄塵休澣自公日晏慰及私辰蜀琴抽白  
雪郢曲繞陽春肴乾酒未缺金壺啓夕淪回軒駐輕蓋  
留酌待情人 翫月城西門

鳳樓十二重四戶八綺窓繡栢金蓮花桂柱玉盤龍珠  
簾無隔露羅幌不勝風寶帳三十萬為爾一朝容揚芬  
紫煙上垂彩綠雲中春吹回白日霜歌落塞鴻但懼秋

塵起盛愛逐衰蓬坐視青苔滿卧對錦筵空琴筑縱橫  
散舞衣不復縫古來皆歇薄君意豈獨濃惟見雙黃鵠  
千里一相從 代京雒篇

直如朱絲繩清如玉壺冰何慙宿昔意猜恨坐相仍人  
情賤恩舊世義逐衰興毫髮一為瑕邱山不可勝食苗  
實碩鼠點白信蒼蠅鳬鵠遠成美薪芻前見凌申黜哀  
女進班去趙姬昇周王日淪惑漢帝益嗟稱心賞雖難  
恃貌恭豈易憑古來共如此非君獨撫膺 擬樂府白

頭吟

李春梅始落女工事蠶作采桑淇洧間還戲上宮閣早  
蒲時結陰晚篴初解箨藹藹霧滿閨融融景盈幕乳燕  
逐草蟲巢蜂拾花藥是節最暄妍佳服又新爍斂歎對  
回塗揚歌弄場藿抽琴試佇思薦珮果誠託承君郢中  
美服義久心諾衛風古愉豔鄭俗舊浮薄虛願悲渡湘  
空賦笑渥洛盛明難重來淵意為誰涸君其且調弦桂  
酒妾行酌采桑詩

銜淚出郭門撫劍無人遠沙風聞塞起離心春鄉幾夜  
分就孤枕夢想暫言歸孀婦當戶笑搔絲復鳴機慊歎  
論久別相將還綺幃靡靡簷下涼朧朧窻裏輝刈蘭爭  
芬芳采菊競歲蕤開匳集香蘇探袖解纓徽寐中長路  
近覺後大江遶驚起空歎息恍忽神魂飛白水漫浩浩  
高山壯巍巍波潮異往復風霜改榮衰此土非吾土慷慨  
當訴誰 夢還詩

河畔草未黃胡鴈已矯翼秋蛩扶戶吟寒婦晨夜織去

歲征人還流傳舊相識聞君上壘時東望久歎息宿昔  
衣帶改旦暮異容色念此憂如何夜長憂向多明鏡塵  
匣中寶琴生網羅 擬古

雙燕戲雲崖羽翮始差池出入南閨裏經過北堂垂意  
欲巢君幕層楹不可窺沈吟芳歲晚徘徊韶景移悲歌  
辭舊愛銜泥覓新知 詠燕

寒灰滅更然夕華晨更鮮春冰雖暫解冬冰復還堅佳  
人捨我去賞愛長絕緣歡至不留時每感輒傷年

雙劍將別離先在匣中鳴煙雨交將夕從此遂分形  
雌沈吳江水雄飛入楚城吳江深無底楚城有崇扃一為  
天地別豈直阻幽明神物終不隔千祀儻還并贈故  
人

王素學阮步兵體

沈情發遐慮紆鬱懷所思髣髴聞簫管鳴鳳接羸姬  
聯綿共雲翼嫵婉相攜持寄言芳華士寵利不常期  
涇渭分清濁視彼谷風詩

吳邁遠擬樂府四首

可憐雙白鶴雙雙絕塵氛連翩弄光景交頸遊青雲逢  
羅復逢繳雌雄一旦分哀聲流海曲孤叫出江濱豈不  
慕前侶為爾不及羣步步一零淚千里猶待君樂哉新  
相知悲矣生別離恃此百年命共逐寸陰移譬如空山  
草零落心自知飛來雙白鵠

百里望咸陽知是帝京城綠樹搖雲光春城起風色佳  
人愛景華流靡園塘側妍姿豔月映羅衣飄蟬翼宋玉

歌陽春已人長歎息雅鄭不同賞那令君愴惻生平重  
愛惠私自憐何極 陽春曲

生離不可聞况復長相思如何與君別當我盛年時蕙  
花每搖蕩妾心空自持榮乏草木歡悴極霜露悲富貴  
身難老貧賤年易衰持此斷君腸君亦宜自疑淮陰有  
逸將折翮謝翻飛楚亦扛鼎士出門不得歸正為隆準  
公杖劍入紫微君才定何如白日下爭暉 長別離  
晨有行路客依依造門端人馬風塵色知從河塞還時



我有同棲結宦遊邯鄲將不異客子分飢復共寒煩君  
尺帛書寸心從此單遣妾長憔悴豈復歌笑顏簷隱千  
霜樹庭枯十載蘭經春不舉袖秋落寧復看一見願道  
意君門已九關虞卿棄相印擔簦為同歡閨陰欲早霜  
何事空盤桓長相思

鮑令暉雜詩六首

裊裊臨窻竹藹藹垂門桐灼灼青軒女泠泠高臺中明  
志逸秋霜玉顏豔春紅人生誰不別恨君早從戎鳴弦

慙夜月紺黛羞春風  
擬青青河畔草

客從遠方來贈我漆鳴琴  
木有相思文弦有別離音  
終身執此調歲寒不改心  
願作陽春曲宮商長相尋  
擬客從遠方來

自君之出矣臨軒不解顏  
砧杵夜不發高門晝常關  
帳中流熠燿庭前華紫蘭  
物枯謝節異鴻來知客寒  
遊用暮冬盡除春待君還  
題書後寄行人

寒鄉無異服衣氍代文練  
月月望君歸年年不解綰  
荆

揚春早和幽冀猶霜霰北寒妾已知南心君不見誰為  
道辛苦寄情雙飛燕形迫杼煎絲顏落風催電容華一  
朝盡惟餘心不變 古意贈今人

明月何皎皎垂櫳照羅茵若共相思夜知同憂怨晨芳  
華豈矜兒霜露不憐人君非青雲逝飄迹事咸秦妾持  
一生淚經秋復度春

君子將徭役遺我雙題錦臨當欲去時復留相思枕題  
用常著心枕以憶同寢行行日已遠轉覺思彌甚 代

葛沙門妻郭小玉詩

丘巨源雜詩二首

妙縞貴東夏巧媛出吳闈裁狀白玉壁縫似明月輪表  
裏鏤七寶中銜駭雞珍畫作景山樹圖為河洛神來延  
揮握玩入與鑲釧親生風長袖際晞華紅粉津拂眄迎  
嬌意隱映含歌人時移務忘故節改競存新卷情隨象  
簞舒心謝錦茵慙歇何足道敬哉先後辰詠七寶扇  
披衽乏遊術憑軾寡文才蓬門長自寂虛席視生埃貴

里臨妝館東隣歌吹臺雲間嬌響徹風末豔聲來飛華  
瑤翠幄揚芬金碧栝久絕中州美從念尸鄉灰遺情悲  
近世中山安在哉聽鄰妓

王元長雜詩五首

遊禽暮知反行人獨不歸坐銷芳草氣空度明月輝  
嚙容入朝鏡思淚點春衣巫山彩雲沒淇上綠條稀待君  
竟不至秋鴈雙雙飛

霜氣下孟津秋風度函谷念君淒已寒當軒卷羅縠織

手廢裁縫曲鬢罷膏沐千里不相聞寸心鬱氛氲况復  
飛螢夜木葉亂紛紛 古意

抱月如可明懷風殊復清絲中傳意緒花裏寄春情掩  
抑有奇態悽鏘多好聲芳袖幸時拂龍門空自生 詠

琵琶

幸得與珠綴幕屋君之楹月映不辭卷風來輒自輕每  
聚金鑪氣時駐玉琴聲俱願致尊酒蘭缸當夜明 詠  
慢

響像巫山高薄暮陽臺曲煙霞乍舒卷蘅芳時斷續彼  
美如可期寤言紛在屬撫然坐相思秋風下庭綠 巫  
山高

謝朓雜詩十二首

日落窻中坐紅妝好顏色舞衣襞未縫流黃覆不織蜻  
蛉草際飛遊蜂花上食一遇長相思願寄連翩翼

清吹要碧玉調弦命綠珠輕歌急綺帶含笑解羅襦餘  
曲詎幾許高駕且峙壩徘徊韶景暮惟有洛城隅 贈

王主簿

掖庭聘絕國長門失歡讌相逢詠薜蘿辭寵悲團扇花  
叢亂數蝶風簾入雙燕徒使春帶賒坐惜紅顏變平生  
一顧重風昔千金賤故人心尚爾故心人不見 和王  
主簿怨情

瓊閨釧響聞瑤席芳塵滿要取洛陽人共命江南管情  
多舞態遲意傾歌弄緩知君密見親寸心傳玉鉸

上客光四座佳麗直千金挂釵報纓絕墮珥苔琴心蛾



眉已共笑清香復入衿夜樂夜方靜翠帳垂沈沈  
夜  
聽妓

生平宮閣裏出入侍丹墀開筭方羅縠窺鏡比蛾眉初  
別意未解去久日生悲顚顚不自識嬌羞餘故姿夢中  
忽髣髴猶言承讌私詠邯鄲故才人嫁為厮養卒婦  
秋夜促織鳴南隣擣衣急思君隔九重夜夜空佇立北  
窻輕幔垂西戶月光入何知白露下坐視前階濕誰能  
長分居秋盡冬復及秋夜

發翠斜漢裏蓄寶宕山峰抽莖類僊掌銜光似燭龍飛  
蛾再三繞輕花四五重孤對相思夕空照儻衣縫 銓  
杏梁賓未散桂宮明欲沈曖色輕帷裏低光照寶琴徘徊  
迴雲髻影灼爍綺疎金恨君秋月夜遺我洞房陰 燭  
本生朝夕池落景照參差汀洲蔽杜若幽渚奪江離遇  
君時采擷玉座奉金卮但願羅衣拂無使素塵彌 席  
玲瓏類丹檻苔亭似玄闕對鳳懸清冰垂龍挂明月照  
粉拂紅妝挿花理雲髮玉顏徒自見常畏君情歇 鏡

臺

新葉初冉冉初蒙新霏霏逢君後園讌相隨巧笑歸親  
勞君玉指摘以贈南威用持挿雲髻翡翠比光輝日暮  
長零落君恩不可追落梅

陸厥中山王孺子妾歌一首

如姬寢卧內班妾坐同車洪波陪飲帳林光晏秦餘歲  
暮寒飈及秋水落芙蓉子瑕矯後駕安陵泣前魚賤妾  
終已矣君子定焉如

施榮泰雜詩

趙女修麗姿燕姬正容飾妝成桃毀紅黛起草慙色羅  
裳數十重猶輕一蟬翼不言殺袖輕專歎風多力鏘珮  
玉池邊弄笑銀臺側折柳貽目成挿蒲贈心識來時嬌  
未盡還去媚何極

玉臺新詠卷四